

بِسْمِ اللَّهِ الرَّحْمَنِ الرَّحِيمِ



Khutba Jummah

Hazrat Khalifatullah Munir. A. Azim (atba)

07 Août 2020
16 Dhul-Hijjah 1441 AH

Après ki li fine salué tous so bane disciples (et tous bane Musulmans) entier le monde avec le *Salaam* - la Salutation de paix dans l'Islam - Hazrat Khalifatullah (atba) fine lire Tashahhud, Ta'uz, Surah Al Fatiha, et ensuite li fine axé so Khutba lors :

Du'as (Invocations) (Pt. 5)

أَدْعُوا رَبَّكُمْ تَضَرُّعًا وَخُفْيَةً إِنَّهُ لَا يُحِبُّ الْمُعْتَدِينَ
وَلَا تُفْسِدُوا فِي الْأَرْضِ بَعْدَ إِصْلَاحِهَا وَأَدْعُوهُ خَوْفًا
وَطَمَعًا إِنَّ رَحْمَتَ اللَّهِ قَرِيبٌ مِّنَ الْمُحْسِنِينَ

Allah dire dans Quran : « **Invoque ou Seigneur avec humilité et en secret. Assurément Li pas content bane transgresseurs, et pas bizin formente désordres lors la terre après ki fine ena l'ordre. Et invoque ou Seigneur avec crainte et l'espoir. Assurément la miséricorde d'Allah li proche de bane dimounes ki faire le bien.** » (Al-Arraf 7: 56 & 57)

[À la lumière de sa bane versets Quran là, Huzur (atba) fine cause lors l'importance faire la paix, et maintenir la paix, et invoque Allah en secret, et meilleur façon invoque Allah en secret, kot ou lever dans la nuit pour Namaz Tahajjud, kot ou zoine Allah en secret, kot personne pas conner et ou invoque

Li. Ene dimoune capave pas pé invoke Allah selman la nuit, mais pendant lizour dans so bane *Zikr*. Allah capave pas accepter ene *duah* tout de suite, ou le lendemain ou dans ene semaine etc. Après commié des années aussi Li capave exauce sa *duah* là et faire li réaliser.

Huzur (atba) dire aussi ki bane croyants faudé pas veille zaffaires bane les autres. Pas fer couma sa femme ki malgré ki li ti pé fer so Namaz mais sak fois ene dimoune ti pé vine kot so voisin, li ti pé compte le nombre par mette bane roches et ensuite li ti pé compter commié dimounes fine vini à travers le nombre de roches ki ena. Finalement c'est sa bane roches là même ki fine vine ene barrière pou li entre li et le Paradis et kot finalement li alle tombe dans l'enfer. Par contre, ene prostituée, Allah fine gagne pitié de lui à cause d'ene action, kot li fine trouve ene lichien, ene créature d'Allah ti pé gagne bien soif, et li fine mette li même en difficulté et fer tout pou cherche de l'eau et mette li dans so soulier afin pou apaize la soif de sa lichien là. Finalement Allah fine admette li dans Paradis.

Faudé pas ki kan ou pé invoke Allah, en toute secret, mais selman après ou alle créer désordre lors la terre. Et ensuite ou alle dire ki malgré ki ou pé fer *duahs*, Allah pas pé *Qaboul* (exauce) sa bane *duahs* là). Ou mette bane doutes dans l'exaucement de sa bane *duahs* là. Au contraire ene croyant, faudé tous les temps li mette confiance dans Allah et li confiant ki Allah pou exauce sa bane *duahs* là. Pareillement, parfois ena sa bane kalité dimounes là zot dire le prophète, le Khalifatullah fer *duahs*, mais zot même zot pas ena confiance ki Allah pou exauce sa bane *duahs* là ; zot mette doute dans l'exaucement de sa bane *duahs* là. Alors Allah pas exauce sa bane *duahs* là parski sa bane dimounes là fine mette doute dans sa bane *duahs* là ; zot pas ena confiance ki Li pou exauce sa bane *duahs* là. Et alors, ene tas critiques ena kot ena dire, ki le prophète fine fer *duahs*, mais nannié pas fine arriver ! Ou bizin ena *Taqwa* (la crainte d'Allah) et l'espoir aussi. Faudé ou ena confiance ki Allah pou accepter sa bane *duahs* là. Allah pas content bane transgresseurs.

Faudé pas ou ena mauvaises pensées lors lé zot. Par exemple ti ena ene dimoune dans ene désert ki ti ena quelques fruits comme provision. Kan li fine fatiguer et li ti ena l'intention pou reposer, alors li fine penser, si arriver li rentre dans ene grand sommeil, et si ene kikaine vini, li pou capave cokain so bane fruits. Alors li fine urine lors so bane fruits pour ki les autres capave gagne

dégoût. Finalement, kan li fine lever, personne pas ti vini, et li fine bizin saryer sa bane fruits lors quoi li fine uriner là. Li-même li fine gagne dégoût avec so propre pipi, mais le fait pas ti ena les autres provision, après ki li fine voyager et fatiguer, li pas ti ena choix pou mange sa bane même fruits ki li fine uriner là. Alors, la leçon c'est ki faudé pas ou ena mauvais l'intention ou l'idée lors personne, et ou pas commette bane tel actions kot ou alle handicap ou-même à la fin !]

C'est sa même série Khutba lors *duahs* ki mo pé faire par la grâce d'Allah et azordi mo pou présente bane *duahs* ki nous bien-aimé prophète (saws) ti pé faire et nous aussi nous capave profite beaucoup de sa bane *duahs* là. Mo pou commence mentionne sa bane *duahs* là à travers bane Hadiths.

Premier Hadith, li de Tirmidhi, *Kitab-ul-Manaqib* kot Hazrat Abbas (ra) pé dire ki Hazrat Muhammad (saws) fine adresse li et fine dire li : « *'Kan Lundi arriver, vine kot moi, toi et to bane zenfants, mo pou faire duah pou toi, afin ki Allah donne toi et to bane zenfants bane l'avantages'. Sa jour là nous fine alle kot Hazrat Muhammad (saws) et Hazrat Muhammad (saws) fine faire ene voile pou nous et li fine faire sa duah là: 'Ô Allah donne Abbas et so bane zenfants ene telle pardon ki cachiette et ki ouvert et ki pas laisse aucaine péchés. Ô Allah mette la paix entre li et so bane zenfants'. »*

De Sunan Ibn Majah, Hazrat Ali (ra) rapporter ki : Hazrat Muhammad (saws) fine faire moi vine Qazi, juge dans Yémen. Mo fine dire li : « *Ô Prophète d'Allah, ou pé faire moi vine Qazi, alors ki mo ene jeune. Ki décision ki mo pou capave faire entre dimounes, kan mo même mo pas conne faire aucaine décision ? »*

Kan mo analyse céki Hazrat Ali (ra) fine dire le Saint Prophète (saws), quel humilité Hazrat Ali (ra) ti ena et au fond de li même li ti envie ki le Saint Prophète (saws) pose so la main lors li et faire *duah*. Li conne très bien ki bane grands décisions li bizin prend.

Donc, Hazrat Ali (ra) dire ki Hazrat Muhammad (saws) fine mette so la main lors so poitrine et fine faire sa *duah* là: « **Allahoumma Ahde Qalba houwa thabit Lisaana Hou.** » - *Ô Allah guide so le cœur et affermi so la langue.*

Hazrat Ali (ra) dire ki : *Après ki Hazrat Muhammad (saws) fine faire sa duah là pou moi, jamais mo pas fine en doute kan mo fine bizin faire la justice entre deux dimounes.*

Hazrat Ali (ra) ti ena ene problème liziés ; so liziés ti habituer faire mal et sa ti arriver dépi ki li ti tipti même. Et trois compagnons, Hazrat Saad Bin Abi Waqqas, Hazrat Salwa Bin Aqwa, et Hazrat Suhail Bin Saad (ra) - *Radi Allahu Anhum* - fine témoigne d'ene grand miracle concernant liziés de Hazrat Ali (ra).

À l'époque de la guerre de Khaibar, kan Hazrat Muhammad (saws) fine demande à Hazrat Ali (ra) pou prend l'étendard (c.à.d. pavillon) li fine alle conner ki so liziés ti pé bien faire mal. So liziés ti habituer malade même de temps en temps, mais sa bane jours là li ti pé bien faire mal même. Pareil couma dans Musnad Ahmad Bin Hanbal fine dire, so liziés ti tellement malade ki Hazrat Salwa Bin Aqwa (ra) ti bizin attrape so la main pou faire li marcher. Hazrat Muhammad (saws) fine prend so salive et fine passe lors so liziés, et après sa couma dire liziés là pas ti malade même. Sa li trouve aussi dans Sahih Bukhari Kitab-ul-Maghazi.

Dans Tirmidhi Kitab-ul-Manaqib, Hazrat Umm Attiya rapporter ki Hazrat Muhammad (saws) fine envoye ene l'armée dans laquelle ti ena Hazrat Ali (ra). Li ti dire ki : *Mo fine trouve Hazrat Muhammad (saws) lève so la main et faire sa duah là : « Ô Allah pas donne moi la mort, tanque ki mo pas retrouve [Hazrat] Ali (ra). »*

Donc, Hazrat Ali (ra) fine vivre après Hazrat Muhammad (saws) so la mort, et sa aussi ti ene miracle spécial. Fine rapporté aussi bane kalités miracles de Hazrat Muhammad (saws) kot li fine faire manger augmenter par *duahs*, et beaucoup sa bane miracles là fine rapporter par bane Hadiths authentiques. C'est pourquoi ki ene croyant pas capave ena bane doutes lors bane *duahs* ki Hazrat Muhammad (saws) fine faire.

Par exemple pou bataille de Ahzab, kan bane Muhajireen et bane Ansars ti pé fouille trancher ; zot ti bien, bien faim. D'après coutume bane Arabes, bane Ansars ti pé attache ene roche lors zot ventre, mais kan ene dimoune fine vine faire plainte avec Hazrat Muhammad (saws), li fine trouver ki Hazrat Muhammad (saws) même ti ena deux roches attacher lors so vente ; c.à.d. Hazrat Muhammad (saws) ti pé gagne pli faim ki tous. Dans sa l'état ki li ti été là, ene

compagnon fine alle guette so madame et fine dire li ki Hazrat Muhammad (saws) pé gagne bien faim. *Eski ena kitchose pou manger?* So madame fine dire li : *Alle dehors, ena ene cabris*. Hazrat Jabir (ra) fine sorti et fine faire cabri là *Zibah (halal)*. So madame fine pétri la farine et fine mette la viande là lors di feu.

Hazrat Jabir (ra) fine sorti pou alle appelle Hazrat Muhammad (saws). So madame fine dire li pas appelle beaucoup bane les zot dimounes avec li, pou pas faire madame là gagne la honte et humiliation. Hazrat Jabir (ra) fine vine kot Hazrat Muhammad (saws) et fine dire li doucement dans so zoreille : « *Mo madame fine prépare manger, vini ou avec quelques compagnons.* »

Mais Hazrat Muhammad (saws) fine adresse tous bane dimounes ki ti pé travail et fine dire zot : « *Vini, Jabir fine faire ene invitation générale.* » Et li fine dire Hazrat Jabir (ra) : « *Pas retire dekti lors difé, tanque ki mo pas vini et ni cuit di pain.* » Hazrat Muhammad (saws) fine prend tous dimounes fine alle kot Hazrat Jabir (ra). So madame fine dire li (Jabir) : « *Ki malheur to fine faire toi?* »

Kan Hazrat Muhammad (saws) fine vini, Hazrat Jabir (ra) so madame fine présente li la farine là, et li fine prend un peu so salive et fine mélange avec sa, et li fine faire *duah* pou ki sa manger là gagne beaucoup *barakat*. Après sa li fine dire cuit di pain là et retire cari là lors di feu. Ti ena à peu près mille dimounes. Zot tous fine manger et fine aller, mais pas fine manque aucaine la viande et ni aucaine di pain. Jabir, so madame et so bane zenfants fine manger c'est ki fine rester là.

[Dans le contexte de sa bane miracles de *duahs* là et de façon d'agir de Hazrat Muhammad (saws), Huzur (atba) fine dire ki bane opposants de l'Islam fine faire beaucoup critiques lors li (saws), kot premier, kan li fine recevoir ene invitation personnelle avec permission pou invite seulement quelques compagnons parski ene cabri pas pou assez pou zot tous, alors bane critiques fine dire Hazrat Muhammad (saws), ene prophète fine cause menti – *Nawzobillah min Zaalik*. Et en plus de sa, li fine mélange so salive dans manger, kot d'ordinaire, ene dimoune gagne dégoût pou mange restant ene lotte dimoune et kot li fine mette so salive dans sa manger là. Mais sa bane là pas conner avec ki sagesse et l'intention ki Hazrat Muhammad (saws) fine faire sa. Li ti conner li, ki avec *duahs* ki li pou faire, Allah pou béni sa manger là, et kot zot tous pou capave manger à zot faim. Et de plus, li (saws) ti envie ki Jabir (ra) et so la famille gagne sa l'honneur là, kot Allah montrer So miracles à travers zot repas. En tant ki

prophète, li conner li, séki li pé faire, et sa pas ti dans so l'intention pou humilier Hazrat Jabir (ra) et so madame. Et de plus, faudé ki ena *barakat* (bénédictions) même dans so salive ki Hazrat Muhammad (saws) fine mélange un peu so salive kan li fine faire *duahs* lors sa manger là.

De plus Huzur (atba) fine mentionner aussi couma c'est avec so salive même ki Hazrat Muhammad (saws) fine servi kan li fine fer *duahs* pou liziés de Hazrat Ali (ra) et kot Allah fine montrer So miracle. *Alhamdulillah*]

Hazrat Ibn Abbas (ra) rapporte ene *duah* ki trouve dans Sahih Bukhari. Li dire : « Hazrat Muhammad (saws) fine serre moi contre so poitrine et fine faire sa *duah* là: « **Allahoumma Al Lim houl Hikma** » - Ô Allah montrer li la sagesse. Ene lotte compagnon rapporter ki Hazrat Muhammad (saws) ti faire *duah* pou montrer li le Livre (Quran); sa li possible ki li (saws) fine dire Livre aussi. Ene compagnon fine pense à la sagesse et lotte la-là fine pense Livre. Et sa aucaine doute, Hazrat Ibn Abbas fine gagne ene connaissance et sagesse du livre dans ene façon extraordinaire.

Hazrat Jarir (ra) rapporter, et sa li trouve dans Sahih Bukhari, ki : « Dépi ki mo fine accepter l'Islam, Hazrat Muhammad (saws) pas fine empêche moi vine kot li ; n'importe kan li ti pé guette moi, li ti pé faire ene sourire avec moi. Ene fois mo fine faire ene complainte avec li, ki mo pas capave assize bien lors cheval. Li fine mette so la main lors mo poitrine et fine faire sa *duah* là: « **Allahouma thabit ho waja ho Haadiyan Mahdiya** » - Ô Allah faire li vine ferme et guide li et faire ki li guide les zot.

Après ki Hazrat Muhammad (saws) fine faire sa *duah* là pou li, li fine participe dans cinquante missions importants comme ene cavalier accompli, et pou tous sa bane missions là, li fine remporte ene grand succès. Hazrat Muhammad (saws) fine envoye li vers deux villages Zil Kalah et Zuleim et pou sa bane places là, aussi li fine accompli so mission.

Dans Tirmidhi, Hazrat Saad Bin Abi Waqqas (ra) rapporter ki Hazrat Muhammad (saws) fine faire sa *duah* là pou li: « **Allahoumma astajib li Sa'adin ila da'aka** » - Ô Allah n'importe kan [Hazrat] Saad [Bin Abi Waqqas (ra)] faire *duah*, réponde (ou accepte) so *duah*.

En résultat de sa *duah* de Hazrat Muhammad (saws) là, fine rapporter ki Hazrat Saad Bin Abi Waqqas (ra) ti vine populaire pou l'acceptation de so bane *duahs* et bane là ti pé même peur so bane *bad-duahs*. Et kan li ti pé faire *duahs*, bane dimounes ti certain ki sa ti pou accompli. Dans ene lotte Hadith, Hazrat Muhammad (saws) fine donne Hazrat Saad (ra) la bonne nouvelle ki li pou gagne ene longue la vie et sa li rapporter dans Bukhari - *Kitabul Wasaya*.

Maintenant mo pou cite ene lotte Hadith à propos de Hazrat Saad (ra) même kot Hazrat Muhammad (saws) fine faire *duah* pou li, et sa même l'heure là Allah (swt) fine donne la bonne nouvelle d'acceptation de sa *duah* là. Au début kan Hazrat Saad (ra) ti accepter l'Islam, et li fine faire *Hijrat*, sorti Makkah pou alle Madina. Kan Hazrat Muhammad (saws) fine faire so dernier Hajj, Hazrat Saad (ra) ti malade dans Makkah, et li fine peur attention si li mort dans Makkah li pas gagne *sawaab* (récompense) de so *Hijrat*. Kan Hazrat Muhammad (saws) fine vine kot li, Hazrat Saad (ra) fine demande le Saint Prophète (saws) pou faire *duah* ki li pas mort dans sa place kot li fine fini faire *Hijrat* là, c.à.d. pas faire li mort à Makkah. So l'état ti tellement grave sa l'heure là, ki ti fini faire bane derniers l'arrangement pou so testament.

Hazrat Muhammad (saws) fine faire sa *duah* là: « Ô Allah complète l'émigration de mo compagnon (ki To content avec li). » Et en même temps li fine donne Hazrat Saad (ra) la bonne nouvelle de l'acceptation de sa *duah* là. Li fine dire li: « Ô Saad, *Insha-Allah*, Allah pou donne toi ene longue la vie et beaucoup dimounes pou tire l'avantage de toi avec to bane *duahs* et bane dimounes ki to faire *bad-duah* certainement zot pou souffert. » Avec *duah* de Hazrat Muhammad (saws), Hazrat Saad (ra) fine gagne ene guérison miraculeuse ; Parmi dix compagnons ki ti gagne bonne nouvelle de Paradis, c'est li même ki fine mort en dernier.

Le sujet de *duah* pé vine très intéressant et encouragement, kot à travers sa bane *duahs* là mo espéré, nous la vie de tous les jours pou traverse à travers *duahs* même. Sa même zarme de bane croyants ; sa zarme là, li pli puissant ki bane les autres zarmes ki l'homme pé fabriquer pou détruire l'humanité couma zot même.

Donc, faute de temps, fine arrive l'heure pou arrêter ; mo arrête ici même et mo faire *duah* avec Allah (swt) pour Li continuer donne moi sa *Tawfiq* là pou mo continuer lors sa même sujet de « *Duahs* » là pou bane Khutbas ki pé vini dans bane semaines ki pé vini devant nous, *Insha-Allah*.

Ki Allah béni zot et inculquer dans zot l'habitude pou invoke Li tous les temps, ki dans bane moments de malheurs mais aussi dans bane moments de contentement aussi kot zot pas oublier pou remercier Li. *Insha-Allah, Ameen.*

Alhamdulillah, Summa Alhamdulillah, mo raconte zot ene bien joli rêve et message ki mo disciple Naib Amir Fazil Jamal Sahib de Delhi fine faire sa semaine là : Li fine trouve moi et Hazrat Ummul Mumineen Sadr Sahiba Fazli Amena fine vine Mathra. Ti ena li, accompagner de so papa, et ensam, nous tous pé discute lors bane plans, bane façons couma pou faire plisse Tarbiyyat... pour nous bane membres, et bane lézot projets importants.

[Huzur (atba) fine dire ki Tarbiyyat li bien important. Par exemple, ene de bane plus grand Tarbiyyat, kan faire Namaz, pas nek faire Namaz vite-vite couma dire poule pé bek maïs. Namaz fauder pas vine couma ene fardeau lors kikaine. Namaz bizin faire bien, avec concentration et respect. Faudé pas presser. Kan ene dimoune fer Namaz tousel, individuel, profite sa bane moments là, fer beaucoup de *duahs*. Sa c'est le plus grand Tarbiyyat, l'éducation ki nous capave donne nous bane membres.]

Ensuite Fazil Jamal Sahib fine recevoir sa message là : **'Wa Kaana Rabbika Khulafau'**, ki veut dire: « *Zot bane Hautes Représentants de To Seigneur.* », kot Allah pé fer zot conner et comprend, ki voilà, sa bane ki fine vini là, kot ena Allah So Khalifatullah, c'est bane hautes représentants ki vine de côté d'Allah. *Masha-Allah. Alhamdulillah.*

Couma ou pé trouver, tous les semaines, nous bane membres [mo bane disciples] de plusieurs pays pé gagne bane messages, bane révélations, bane inspirations... Nous pas pé dire sa avec beaucoup *Fakkar* (l'arrogance, vanité). C'est avec beaucoup l'humilité ki nous dire sa pou montrer ki, voilà, bane ki fine attrape la corde d'Allah, la Manifestation Divine, ine croire sincèrement, et zot *Iman* (la foi) sincère, voilà couma Allah pé donne zot messages.

Faudé ki sa *Iman* (la foi) là reste sincère parski dans le passé, ena beaucoup fine gagne bane messages aussi, fine gagne beaucoup bane révélations, ena fine écrire bane longues longues textes ki Allah fine inspire zot, mais ou conner, *Iman* (la foi)

ene zaffaire li bien bien fragile sa. Si ou pas conne contrôle li, si ou pas conne tini ou *Iman* (la foi), bé alors ou capave alle perdi tout, ou alle perdi *Iman*.

[Au cours de so Khutba, Huzur (atba) fine aussi cause lors bane révélations ki li fine gagner de la part d'Allah, et surtout li fine expliquer couma sa bane révélations là capave vini, en forme d'ene son d'ene la cloche, ou ene la voix dire quelque chose etc. Li fine raconte ene anecdote d'ene message ki li ti gagner et ki Allah fine fer li comprend toute de suite pour li partage sa dans le Khutba Jummah. Li ti ene place, et Allah informe li comment quelques personnes – bane membres de so famille même – ti pé contraye li et dire beaucoup bane mauvais causer lors li. Sa fine affecter li beaucoup. Li dire, ena dimounes pas pou croire ki Allah fine capave révèle li de bane causer ki dimounes dire lors li et pourtant sa arriver, et Allah informe li pour ki li conne vrai visages de sa bane dimounes là.

Huzur (atba) fine aussi cause à propos de bane exaucement de *duahs* ki li fine fer pour ene so proche famille ki ti demande li fer *duah* pour li, parski li ena ene construction pou fer. Sa dimoune là fine garde secret dans li, ki avec confinement (COVID-19) ki fine passer, li sans le sous, mais Allah révèle sa avec So Khalifatullah et dire li ki intel ena Zéro sous, mais alors le Khalifatullah (atba) fine faire *duah* pou ki Allah renforci sa zéro là et ajoute bane les autres zéro et chiffres avec sa pour ki li vine ene somme importante, mais par miracle, ene dimoune fine ensuite approche sa dimoune ki ti dans difficulté financier là et fine remette li ene somme bien important kot li fine capave contigne avec so travail. Sa ti ene grand manifestation de *duah* du Khalifatullah kot Allah pas fine seulement informe So Serviteur de l'état de so proche, mais aussi fine envoie ene dimoune pou aide li. Dans sa contexte là, Huzur (atba) fine raconter ki ene fois pareil, ene lotte membre de so famille – dans le plan de construction d'ene maison – aussi fine trouve ene grand miracle, kot Huzur (atba) ti fer *duah* pou ki Allah fer li réussi monte ene l'étage additionnelle, mais sa dimoune là pas ti ena le moyen pou fer ene construction à sa l'époque là et ti penser ki sa impossible, mais Allah envoie ene lotte dimoune, ene inconnu d'ene lotte religion ki remette avec confiance ene bel somme l'argent kot sans attane li fine capave fer so construction. *Alhamdulillah.*]

Donc, ki Allah garde tous mo bane disciples lors *Siratwal Mustaqeem* (le droit chemin) et faire zot *Iman* (la foi) vine bien bien ferme. Et zot, zot bane zenfants,

toutes la familles, tous bane membres du Jamaat Ul Sahih Al Islam ki trouve dans n'importe ki pays à travers le monde en entier, ki Allah faire zot vine bane **SAHIH** al Islam et faire zot reste bien ferme dans *Siratwal Mustaqeem* (le droit chemin) et reste attacher – attrape la corde d'Allah bien fermement, ou aussi ou pou trouve bane miracles d'Allah, mais kan ou trouve sa bane signes là, sa bane miracles d'Allah là, prend sa avec toute humilité, ou faire le *Sijda*, ou remercier Allah... Mais pas faire *Fakkar* (l'arrogance, vanité) kan Allah fine montrer ou bane kitchoses (signes etc.). Au contraire, pli ou vine humbles, ou pou vine couma sa pié fruits là, pli ou verser (courber), pli pié là pou rapporter, pli ou pou gagne bane récompenses ki pou dessane du ciel. *Insha-Allah, Ameen, Ya Rabbul Aalameen.*